

Cynulliad Cenedlaethol Cymru

Fframwaith Rheoli Risg A Buddion

Gwneud Gwahaniaeth



Cynulliad Cenedlaethol Cymru yw'r corff sy'n cael ei ethol yn ddemocrataidd i gynrychioli buddiannau Cymru a'i phobl, i ddeddfu ar gyfer Cymru ac i ddwyn Llywodraeth Cymru i gyfrif.

Cynulliad Cenedlaethol Cymru

Fframwaith Rheoli Risg A Buddion

Gwneud Gwahaniaeth



Neges gan Claire Clancy Prif Weithredwr a Chlerc y Cynulliad



Yn y blynyddoedd diwethaf, mae sefydliadau wedi treulio amser ac egni cynyddol ar lywodraethu corfforaethol a rheoli risg. Gwn y gall y pwnc “risg” ei hun wneud i chi boeni am fiwrocratiaeth a chael proses newydd arall eto. Mewn gwirionedd, credaf fod rheoli risg effeithiol yn ddull gwirioneddol gadarnhaol ar gyfer unigolion a’u sefydliadau—gall eu helpu i “*wneud gwahaniaeth*”. Mae llawer mwy iddo na llenwi ffurflenni yn unig—mae rheoli risg yn golygu cael diwylliant, prosesau a’r strwythur sydd, gyda’i gilydd, yn golygu:

- ein bod yn cael y mwyaf o gyfleoedd posibl;
- lleihau effaith y bygythiadau i’r sefydliad ac, yn y pen draw;
- cyflawni ein hamcanion.

Diben cael fframwaith rheoli risg yw annog pobl i gymryd risgiau wedi’u rheoli. Nid yw’n ymwneud ag osgoi cymryd risgiau. Gall cymryd risgiau wedi’u rheoli olygu y gallwn wneud y mwyaf o gyfleoedd newydd a defnyddio dulliau arloesol. Mewn gwirionedd, mae’n atal sefydliadau rhag osgoi risg. Mae cael iaith gyffredin a phroses o uwchraddio ar gyfer risgiau hefyd yn helpu i sicrhau bod camau prydlon ac addas yn cael eu cymryd—mae’n rhoi ffordd i bawb godi materion sydd o bosibl yn eu poeni. Felly, rwyf yn awyddus bod gennym y dull gorau posibl o reoli risg ac rwyf yn credu y bydd mabwysiadu a chroesawu’r fframwaith hwn yn rhoi buddion gwirioneddol i ni, fel yr amlinellir yn y ddogfen hon.

Claire Clancy
Prif Weithredwr a Chlerc y Cynulliad

Cyflwyniad

Diffiniadau o risg a rheoli risg

1. Caiff risg ei ddiffinio fel: “uncertainty of outcome, whether positive opportunity or negative threat, of actions and events”¹.
2. Mae rheoli risg yn nodi'r risgiau i weithrediadau ac amcanion sefydliad, y tebygolrwydd y bydd y risgiau hyn yn cael eu gwireddu ac effaith hynny, a'r trefniadau i'w lliniaru.

Rheoli risg yn ei gyd-destun

3. Mae llywodraethu da yn ymwneud â sicrhau bod sefydliad yn gwneud y pethau iawn, yn y ffordd iawn, ar gyfer y bobl iawn, mewn ffordd agored, gonest, cynhwysol ac amserol. Mae rheoli risg yn rhan annatod o lywodraethu da², ac mae rheoli buddion yn ymestyn hyn i gynnwys canlyniadau cadarnhaol rheoli risg yn effeithiol a gwireddu cyfleoedd.
4. Y pwynt cychwyn yw'r hyn y mae'r sefydliad eisiau ei gyflawni. Drwy ddefnyddio'r wybodaeth ynghylch parodrwydd y sefydliad i gymryd risg, gellir rheoli risgiau i ategu a sicrhau llwyddiant, a fydd yn ymestyn i wireddu cyfleoedd i wella. Bydd dull cynhwysol, gyda dealltwriaeth a rennir ynghylch terminoleg a buddion busnes, ac ymrwymiad o'r brig, yn datblygu diwylliant o fod yn ymwybodol o risg, ac o ganolbwyntio ar berfformiad ac awydd ymysg yr holl staff i wella pethau.
5. Mae Cynulliad Cenedlaethol Cymru wedi ymrwymo i gael dull rhagweithiol i reoli risg a buddion sydd wedi'i chynnwys yn y fframwaith llywodraethu a'r cylchoedd cynllunio.

Diben y Fframwaith Rheoli Risg a Buddion

6. Diben cael fframwaith rheoli risg a buddion yw:
 - annog pobl i gymryd risgiau wedi'u rheoli, i beidio ag osgoi risgiau, ac i'n helpu i beidio bod yn wrth-risg;
 - annog pobl i fanteisio ar gyfleoedd newydd; a
 - annog pobl i fabwysiadu dull arloesol o ddatrys problemau.

¹ Trysorlys EM, The Orange Book: Management of Risk – Principles and Concepts

² Y Comisiwn Archwilio

7. Bydd mabwysiadu a chroesawu'r fframwaith:
- yn cynyddu ein rhagolygon o ran cyflawni ein nodau, ein hamcanion a'n blaenoriaethau drwy nodi a rheoli'r bygythiadau a'r cyfleoedd;
 - yn cynorthwyo'r broses o flaenoriaethu sut y dyrennir adnoddau drwy nodi risgiau a materion yn glir a'u pwysigrwydd mewn perthynas â chyflawni'r nodau a'r amcanion hynny;
 - yn rhoi rhybudd cynnar ynglŷn ag unrhyw broblemau posibl;
 - yn llywio gwelliannau i'r gwasanaeth yn hytrach nag amlygu methiannau;
 - yn darparu iaith gyffredin a phroses gynyddol ar gyfer risgiau i helpu i sicrhau bod camau prydlon ac addas yn cael eu cymryd; ac
 - yn rhoi'r sgiliau i bawb fod yn hyderus i gymryd risgiau, gan alluogi eraill i gymryd mwy o risg, ac nid llai!
8. Mae'r fframwaith hefyd yn ceisio sicrhau y gall y Prif Weithredwr, fel y Swyddog Cyfrifyddu, gyflawni ei chyfrifoldebau o dan y Datganiad ar Reolaeth Fewnol, sydd hefyd yn ffurfio rhan o Fframwaith Llywodraethu Corfforaethol y Cynulliad. Ceir manylion y fframwaith hwnnw ar wefan y Cynulliad.

Y Fframwaith

9. Mae dwy ran i'r fframwaith hwn, sef y polisi a'r broses:

Rhan 1: Mae'r Polisi Rheoli Risg a Buddion yn amlinellu ein dull o reoli risg a buddion, rolau a chyfrifoldebau, y prif brosesau a'r trefniadau adrodd yn ôl.

Rhan 2: Mae'r adran am y Broses Rheoli Risg a Buddion yn disgrifio'r gweithdrefnau a'r prosesau y dylid eu dilyn i weithredu'r Polisi Rheoli Risg a Buddion.

Cyflwynwyd y fframwaith ym mis Mehefin 2009

Cynulliad Cenedlaethol Cymru

Fframwaith Rheoli Risg A Buddion

Rhan 1: Polisi Rheoli Risg A Buddion

Cynnwys

1. Diben ac amcanion y polisi
2. Y parodrwydd i gymryd risg
3. Cyfrifoldebau
4. Y prosesau a'r trefniadau allweddol ar gyfer adrodd yn ôl
5. Canlyniadau

Atodiad A: Manylion y cyfrifoldebau yn ôl y categori risg

Atodiad B: Y berthynas â pholisïau eraill

Adran 1: Diben ac amcanion y polisi

1. Mae'r polisi hwn yn amlinellu ein dull o reoli risg a buddion, rolau a chyfrifoldebau, prosesau allweddol a threfniadau adrodd yn ôl.
2. Bydd mabwysiadu'r dull hwn yn ein helpu i ddatblygu a sefydlu diwylliant drwy'r Cynulliad lle byddwn yn ceisio nodi, dadansoddi, rheoli a monitro'r risgiau y byddwn yn eu hwynebu ac i gael y mwyaf o'r cyfleoedd posibl i wella ein perfformiad ar lefel strategol, lefel y rhaglenni, lefel y prosiectau a lefel weithredol yn barhaus ac yn gyson. Bydd hefyd yn sicrhau bod prosesau a sianelau cyfathrebu effeithiol ar waith i alluogi staff i nodi risgiau a buddion.
3. Rydym eisiau i staff weld buddion cyflwyno syniadau ac awgrymiadau i wneud gwelliannau. Mae datgan bod problemau neu fannau gwan yn bodoli yn llunio rhan o hyn, ond gyda chanlyniad cadarnhaol – sef y bydd yn gwella pethau i ni, i Aelodau'r Cynulliad, ac i'n holl ymwelwyr.
4. Dylid sylfaenu penderfyniadau i gymryd risgiau ar ddealltwriaeth o'r math o risg dan sylw a lefel y risg honno, ynghyd â chymryd camau a gwneud gwaith monitro clir i'w rheoli. Rydym eisiau cael ein rhybuddio'n fuan ynglŷn â phroblemau posibl, ond rydym hefyd eisiau grymuso ein staff i gymryd y risgiau *addas*.

Adran 2: Y parodrwydd i gymryd risg

5. Rydym yn cymryd risgiau yn ein bywydau bob dydd, ac rydym yn eu goddef neu'n eu rheoli heb feddwl amdanynt ryw lawer. Ond fel sefydliad, mae angen i ni ddeall faint o risg y gallwn ei oddef. Rydym eisiau cymryd risgiau a reolir yn dda a chymryd mantais o'r cyfleoedd i wella, ond mae angen i ni wneud hyn mewn ffordd bendant i sicrhau ein bod yn gwneud y defnydd gorau o adnoddau a'n bod yn treulio ein hamser yn gwneud gwahaniaeth cadarnhaol.
6. Byddem yn defnyddio ychydig neu ddim egni wrth reoli risgiau sy'n annhebygol iawn o godi (tebygolrwydd isel) neu a fyddai'n effeithio ar ddim ond rhan fach o'r sefydliad (effaith isel). Byddem yn disgwyl gwneud rhywbeth ynghylch risgiau sy'n debygol o achosi embaras neu a fyddai'n effeithio ar ein gallu i gyflawni ein hamcanion hirdymor (effaith uchel) neu sy'n debygol o ddigwydd (tebygolrwydd uchel). Mae angen i ni ystyried hefyd a yw cymryd rhai camau gweithredu yn golygu cymryd gormod o risg, efallai o ran ein diogelwch, ein perthynas â'n cyflogeion neu'n henw da.

7. Byddai cael dealltwriaeth glir o'n parodrwydd i gymryd risg yn ein helpu i:-
 - achub ar gyfleoedd a gwneud penderfyniadau hyddysg;
 - annog rheolwyr i fesur a chymharu risgiau;
 - nodi adnoddau sy'n cael eu gwastraffu ar risgiau rydym yn barod i'w goddef a'u defnyddio mewn meysydd lle mae'r risg yn uwch ac yn hanfodol i'r busnes; a
 - pennu amcanion yn sgil y risgiau.

8. Bydd parodrwydd sefydliad i gymryd risg yn dibynnu ar ei faint, pa mor gymhleth yw'r sefydliad a'r amgylchedd y mae'n gweithredu ynddo. O ran y Cynulliad, er ein bod yn sefydliad eithaf bach, mae gennym broffil cyhoeddus uchel ac, oherwydd hynny, mae angen i ni ddangos ein bod yn llywodraethu'n effeithiol. Felly, mae angen i ni fod yn glir ynglŷn â faint o risgiau rydym yn barod i'w goddef.

9. Ceir manylion y matrices sgorio ar gyfer ein parodrwydd i gymryd risg, ynghyd â'r diffiniadau a'r dulliau ar gyfer mesur ein risgiau, yn y ddogfen ar ein Proses Rheoli Risg a Buddion sy'n ategu'r polisi hwn.

Adran 3: Cyfrifoldebau

10. Cyfrifoldeb y Cyfarwyddwyr a'r Penaethiaid Gwasanaeth yw sicrhau y caiff y polisiau a'r prosesau rheoli risg a buddion eu gweithredu a'u cyfathrebu i'r staff perthnasol yn eu meysydd gwasanaeth. Mae gan bob aelod o staff y cyfrifoldeb i gefnogi ac ymwreiddio'r polisi hwn.

11. Ceir y gwahanol lefelau o gyfrifoldeb am reoli risgiau a buddion y Cynulliad isod:
 - Mae **Comisiwn y Cynulliad**, sy'n gyfrifol am osod nodau ac amcanion strategol y sefydliad ac adolygu ein perfformiad o ran eu cyflawni, yn chwarae rôl bwysig mewn goruchwyllo ac adolygu ein trefniadau rheoli risg a buddion, drwy ganolbwyntio'n benodol ar y risgiau a'r buddion strategol mwyaf sylweddol.
 - Fel y Swyddog Cyfrifyddu, mae'r **Prif Weithredwr** yn gyfrifol am asesu a rheoli'r risgiau sy'n wynebu'r Cynulliad fel rhan o'r system o reoli mewnol i geisio cyflawni nodau, amcanion a pholisiau'r sefydliad.
 - **Y Bwrdd Rheoli** sy'n gyfrifol am sicrhau bod y polisi hwn yn cael ei sefydlu'n effeithiol yn y Cynulliad, ac am adolygu'r risgiau a'r buddion gweithredol strategol a mwyaf sylweddol yn rheolaidd.
 - Mae gan y **Cyfarwyddwyr** rôl arweiniol i'w chwarae mewn adolygu'r risgiau gweithredol mwyaf sylweddol o fewn y Gyfarwyddiaeth, yn ogystal â chyfrannu at reoli'r risgiau strategol yn effeithiol.
 - Mae'r **Penaethiaid Gwasanaeth** yn cadw'r Gofrestr Risg Gweithredol ar gyfer eu Gwasanaeth ac yn sicrhau y rheolir risgiau'n effeithiol. Maent yn gyfrifol am reoli risgiau canolig ac isel yn uniongyrchol ac am amlygu risgiau sylweddol (risgiau uchel neu gritigol) ac unrhyw risgiau sy'n datblygu i fod yn rhai sylweddol. Maent hefyd yn gyfrifol am sicrhau bod y cyfleoedd yn bodoli i staff gyfrannu syniadau ac

awgrymiadau ar gyfer gwelliannau ac am ddefnyddio'r dulliau o roi adborth yn effeithiol er mwyn amlygu risgiau neu welliannau posibl i wasanaethau.

- Mae'r **Byrddau Prosiect a'r Byrddau eraill** yn gyfrifol am sicrhau bod y risgiau a'r buddion sy'n gysylltiedig â'u gwaith yn cael eu nodi a'u rheoli.
- Mae'r **holl staff** yn gyfrifol am amlygu risgiau posibl ac am gynnig awgrymiadau a syniadau ynghylch sut i wella pethau, ac i hysbysu rhywun ynghylch manau gwan neu feysydd sy'n achosi problemau - o fewn eu gwasanaeth hwy a'r tu allan iddo. Dylent hysbysu eu rheolwr llinell, yr Hyrwyddwr Risg neu Bennaeth y Gwasanaeth fel y gellir cyfyngu'r risgiau, eu hasesu a'u monitro. Gall staff hefyd amlygu risgiau a materion ac awgrymu gwelliannau drwy ddefnyddio'r dulliau i gyflwyno syniadau ac amlygu manau gwan.
- Mae'r **Pwyllgor Llywodraethu Corfforaethol** yn gyfrifol am adolygu'r system reoli fewnol, gan gynnwys effeithiolrwydd y trefniadau i reoli risg. Mae'r Pwyllgor yn craffu ar yr adroddiadau archwilio ar lywodraethu, rheoli mewnlol a risg ac yn herio a monitro ymateb y rheolwyr i'r argymhellion a wneir.

12. Datblygwyd y rolau a ganlyn i lywio'r broses o sefydlu dull o reoli risg a buddion drwy'r sefydliad:
- Y **Cynghorwr Risg a Buddion** sydd â'r cyfrifoldeb corfforaethol dros sicrhau bod rheoli risg a buddion yn cael ei gynnwys mewn cynlluniau a pholisïau cyfredol a bod pobl yn meddwl amdano. Mae'n gyfrifol hefyd am ddatblygu a rheoli prosesau i gyfyngu, monitro ac amlygu'r risgiau a nodir, ac am roi cyngor i feysydd gwasanaeth ynghylch nodi a rheoli risgiau.
 - Mae'r **Hyrwyddwr Risg** ym mhob maes gwasanaeth yn gyfrifol am gefnogi'r broses o ddatblygu a gweithredu'r polisi a'r prosesau o fewn eu meysydd gwasanaeth ac am fonitro, adolygu a herio'r risgiau a nodir, y rheolaethau sydd ar waith a'r camau a gymerir i liniaru'r risgiau ymhellach. Yr Hyrwyddwyr Risg yw aelodau'r Fforwm Rheoli Risg a Buddion, sy'n cyfarfod yn rheolaidd i drafod meysydd sy'n achosi problemau neu lle y caiff gwaith ei ddyblygu, a syniadau ac awgrymiadau ar gyfer gwelliannau i'n prosesau i reoli risg a buddion.
13. Ceir mwy o fanylion am y rolau a'r cyfrifoldebau ar gyfer y categorïau risg yn Atodiad 1 i'r polisi hwn.

Adran 4: Y prosesau a'r trefniadau allweddol ar gyfer adrodd yn ôl

14. Dyma'r cylch ar gyfer ein dull o reoli risg a buddion:

Nodi ⇒ Asesu/Mesur ⇒ Cofnodi ⇒ Rheoli ⇒ Monitro/Adolygu ⇒ Adrodd yn ôl

15. Mae'n bwysig ein bod yn nodi risgiau posibl a chyfleoedd posibl ar gyfer gwella yn gyson a'n bod yn deall sut y bydd hyn yn cael ei reoli. Gwnawn hyn drwy ddefnyddio categorïau o risg, fel yr amlinellir isod:

Risgiau gweithredol

Mae'r dull hwn yn golygu bod y Penaethiaid Gwasanaeth, gyda chefnogaeth Hyrwyddwr Risg y maes gwasanaeth, yn nodi'r risgiau gweithredol allweddol sy'n berthnasol i'w meysydd gwasanaeth, mewn ymgynghoriad â staff. Bydd y broses asesu'n cynnwys ystyried: y raddfa risg gynhenid (os nad oes rheolaethau ar waith); y mesurau rheolaeth a'r mesurau wrth gefn sydd ar waith; y raddfa risg weddilliol (gan ystyried y rheolaethau sydd ar waith); ac unrhyw gamau eraill sydd angen eu cymryd i liniaru'r risg.

Bydd y risgiau gweithredol hyn wedyn yn cael eu cynnwys mewn Cofrestr Risgiau Gweithredol ar gyfer pob Cyfarwyddiaeth. Bydd y Penaethiaid Gwasanaeth neu Hyrwyddwr Risg y maes gwasanaeth yn trosglwyddo'r risgiau sy'n debygol o ddatblygu i fod yn rhai sylweddol (y rheini sy'n debygol o ddatblygu i gael statws uchel neu gritigol) i'r Cyfarwyddwr perthnasol. Byddant hefyd yn hysbysu'r Cynghorwr Risg a Buddion fel y gellir cofnodi'r risgiau hyn ar y Gofrestr Risgiau Gweithredol Sylweddol. Bydd y cofrestr gweithredol hyn yn cael eu monitro a'u hadolygu'n fanwl bob chwarter blwyddyn.

Risgiau strategol

Risgiau strategol yw'r rheini allai amharu ar ein hymdrechion i gyflawni'r nodau a bennwyd gan Gomisiwn y Cynulliad neu ein rhwystro rhag eu cyflawni, yn ogystal â nodau trawsbynciol y sefydliad. Bydd y Prif Weithredwr a'r Cyfarwyddwyr yn gyfrifol am nodi a rheoli risgiau strategol, mewn ymgynghoriad a'r Bwrdd Rheoli. Bydd y Cynghorwr Risg a Buddion yn cynorthwyo'r broses hon drwy gynhyrchu a chadw Cofrestr Risgiau Strategol a thrwy gydgyssylltu'r broses monitro ac adolygu.

Risgiau o ran rhaglenni a phrosiectau

Bydd y risgiau i ganlyniadau rhaglenni a phrosiectau'n cael eu nodi yn y cyfnod cynllunio a, lle bo hynny'n addas, bydd camau lliniaru'n cael eu cynnwys yng nghynlluniau unrhyw brosiect. Bydd rheolwyr y rhaglenni/prosiectau yn cynhyrchu ac yn cadw cofrestr risg.

16. Bydd adroddiadau rheolaidd ar reoli risgiau yn cael eu cyflwyno i'r Bwrdd Rheoli, i'r Prif Weithredwr a'r Cyfarwyddwyr, ac i Gomisiwn y Cynulliad. Bydd yr adroddiadau hyn yn canolbwyntio ar newidiadau yn statws y risgiau, pa mor ddigonol yw'r rheolaethau, a phryd y bydd y risgiau'n ymddangos, ac yn amlygu unrhyw gamau gweithredu y cytunwyd arnynt na chafodd eu cwblhau fel y cynlluniwyd. Bydd yr adroddiadau hyn yn cael eu cysylltu â pharodrwydd y gynulleidfa benodol i gymryd risg a lefel cyfrifoldeb y gynulleidfa honno.

17. Ceir mwy o fanylion ynglŷn â'r gweithdrefnau, y prosesau a'r trefniadau ar gyfer adrodd yn ôl yn y ddogfen am y Broses Rheoli Risg a Buddion sy'n ategu'r polisi hwn.

Adran 5: Canlyniadau

18. Mae rheoli risg a buddion yn garreg sylfaen allweddol i reolaeth fewnol a llywodraethu corfforaethol effeithiol. Bydd cael fframwaith ar gyfer rheoli risgiau a buddion a phroses clir o uwchraddio yn helpu'r Cynulliad i sicrhau y bydd problemau'n cael eu datrys yn fuan, cyn iddynt ddod yn broblemau o wir bwys.
19. Yr allwedd i lwyddiant y dull hwn yw adolygu cyson a chyflwyno adroddiadau perthnasol yn amserol ar y lefel addas. Caiff y llwyddiant ei fesur drwy'r canlynol:
- hyder y Prif Weithredwr, y Cyfarwyddwyr a'r Bwrdd Rheoli yn y broses, a'r adroddiadau a gaiff y Bwrdd;
 - ymrwymiad y Penaethiaid Gwasanaeth, a sicrhau eu bod yn gweld buddion y broses o ran darparu gwasanaethau;
 - bod y staff yn chwarae rhan lawn yn y broses, ac yn nodi ac yn asesu risgiau;
 - tystiolaeth bod risgiau'n cael eu rheoli'n effeithiol - bod y tebygolrwydd y ceir risgiau yn cael ei leihau a bod eu heffaith yn cael ei leihau os cânt eu gwireddu;
 - hyder y Pwyllgor Llywodraethu Corfforaethol a Chomisiwn y Cynulliad yn y broses; a
 - adolygiad cadarnhaol yn dilyn archwiliadau mewnol ac allanol, sy'n rhoi sicrwydd "sylweddol".
20. Bydd y fframwaith, y polisi a'r prosesau i reoli risg a buddion yn cael eu hadolygu'n flynyddol i fesur yr effeithlonrwydd a'r effeithiolrwydd, gan ystyried arfer da cydnabyddedig.

Atodiad A: Manylion y cyfrifoldebau yn ôl categori'r risg

Isod ceir disgrifiad o'r cyfrifoldebau dros wahanol gategoriâu o risgiau a buddion, gan gynnwys camau gweithredu rheolaidd a pharhaus:

Risgiau A Buddion Strategol

Y prif gyfrifoldeb: Y Prif Weithredwr a'r Cyfarwyddwyr

Cefnogir gan: Cynghorwr Risg a Buddion y Cynulliad

Mewnbwn gan: Y Penaethiaid Gwasanaeth, Comisiwn y Cynulliad, y Comisiynwyr perthnasol, y Pwyllgor Llywodraethu Corfforaethol (i gynghori ac i roi sicrwydd ynglŷn ag ansawdd) ac archwilwyr mewnol/allanol.

Beth sydd angen ei wneud:

- Asesu beth allai ein hatal neu ein llesteirio rhag cyflawni nodau ac amcanion strategol y Cynulliad neu ein helpu i'w cyflawni;
- Edrych i'r dyfodol a bod yn ymwybodol o risgiau y mae angen uwchraddio eu statws;
- Nodi ac asesu risgiau sy'n ymwneud â blaenoriaethau newydd/sy'n ymddangos, newidiadau o bwys i wasanaethau a phrosiectau;
- Adolygiadau rheolaidd o'r risgiau gweithredol strategol a sylweddol a nodir, sicrhau bod rheolaethau digonol ar waith, a chymryd camau pellach a'u monitro i liniaru neu leihau'r risgiau;
- Papurau strategaeth ar gyfer gwneud penderfyniad i gynnwys asesiad risg a buddion; ac
- Adolygu'r log cwynion a'r *adborth* o bob ffynhonnell.

Pryd:

- monitro parhaus; adolygiad manwl bob chwarter o'r Gofrestr Risg Strategol.

Risgiau A Buddion Gweithredol

Y prif gyfrifoldeb: Y Penaethiaid Gwasanaeth

Cefnogir gan: Cynghorwr Risg a Buddion y Cynulliad a'r Fforwm Rheoli Risg a Buddion (Hyrwyddwyr Risg y meysydd gwasanaeth).

Mewnbwn gan: Y Cyfarwyddwyr a Byrddau'r Gyfarwyddiaeth.

Beth sydd angen ei wneud:

- Paratoi cynlluniau gwasanaeth blynyddol i ategu nodau ac amcanion strategol y Cynulliad, ystyried beth allai atal neu lesteirio'r gwasanaeth rhag gwireddu ei amcanion neu ei helpu i'w gwireddu, a beth allai effeithio ar ei safonau. I gynnwys proses o ystyried parhad busnes;
- Sicrhau bod yr holl dîm yn cymryd rhan, yng nghyfnod cynllunio'r gwasanaeth a thrwy gydol y flwyddyn, gyda chyfarfodydd tîm i drafod risgiau a chyfleoedd posibl;
- Datblygu a chadw logiau adborth o gwynion a chanmoliaeth gan randdeiliaid, neu gael dulliau o adolygu boddhad cwsmeriaid;
- Cynnwys argymhellion archwilio mewn Cynlluniau Gwasanaeth blynyddol, os yw hynny'n addas;
- Nodi ac asesu'r risgiau sy'n ymwneud â blaenoriaethau newydd/sy'n ymddangos, newidiadau o bwys i'r gwasanaeth a phrosiectau; a
- Adolygu'r gofrestr risg yn rheolaidd - mwy o ffocws ar risgiau a buddion â statws uwch a hysbysu'r Cynghorwr Risg a Buddion ynglŷn â newidiadau a materion sylweddol.

Pryd: monitro ac adolygu'r risgiau gweithredol yn barhaus; cynnal trafodaeth gyda'r Cyfarwyddwr pan fydd materion neu feysydd sy'n achos pryder yn codi; y Cynghorwr Risg a Buddion i gyflwyno cofrestr risgiau gweithredol pob chwarter i'r Cyfarwyddwyr.

Atodiad B: Perthynas â pholisïau eraill

Mae ein **Fframwaith Llywodraethu Corfforaethol** wedi'i seilio ar egwyddorion a darpariaethau ategol y mae bwriad iddynt helpu i feithrin diwylliant gweithredol derbyniol drwy'r sefydliad. Mae'r Fframwaith Rheoli Risg a Buddion yn llunio rhan allweddol o'r Fframwaith Llywodraethu Corfforaethol oherwydd bydd yn cynorthwyo'r broses rheoli risgiau busnes allweddol.

Rydym hefyd yn rheoli risgiau drwy ein polisïau a'n strategaethau corfforaethol eraill, a ddatblygwyd gyda'r diben o reoli risgiau sy'n ymwneud â chydymffurfiaeth a llywodraethu. Mae'n werth sôn am rai rhannau o'r polisi hwn, sef:

Parhad busnes

Fel y nodwyd uchod, mae rheoli risg a buddion yn disgrifio'r diwylliant a'r gweithdrefnau sydd ar waith i'n galluogi i nodi, asesu a rheoli risgiau posibl. Mae rheoli parhad busnes yn ein galluogi i gynllunio ar gyfer risgiau neu fygythiadau posibl a allai effeithio ar sut rydym yn cyflenwi ein gwasanaethau. Mae'n nodi ein gweithgareddau busnes critigol ac yn ein galluogi i roi ymateb ystyrlon i'r risgiau neu'r bygythiadau sy'n ymddangos.

Iechyd a diogelwch

Mae Strategaeth Rheoli Risg Iechyd a Diogelwch y Cynulliad yn ceisio gwarchod, cyn belled â'i bod yn rhesymol ymarferol, iechyd, diogelwch a lles holl staff Comisiwn y Cynulliad, yr Aelodau a phawb yr effeithir arnynt gan ei weithgareddau - Rheoliadau Rheoli Iechyd a Diogelwch yn y Gwaith 1999(3). Mae hyn yn cwmpasu dull holistaidd a rhagweithiol at reoli risgiau iechyd a diogelwch na ellir eu dileu. Mabwysiadwyd dull ymarferol i gael yr arfer gorau, wedi ei seilio ar egwyddorion rheoli colledion ac ansawdd.

Bwriedir i'r dull hwn:

- **Fynd i'r afael â** goblygiadau iechyd a diogelwch amrywiol weithgareddau'r Cynulliad
- **Nodi** peryglon ac **asesu** lefel y risg;
- **Cael gwared** ar risgiau lle bo hynny'n bosibl;
- **Lleihau** effaith y risgiau hynny na ellir eu dileu.

Cynulliad Cenedlaethol Cymru

Fframwaith Rheoli Risg A Buddion

Rhan 2: Y Broses Rheoli Risg A Buddion

Cynnwys

1. Cyflwyniad

2. Cyfrifoldebau

3. Y broses

- Nodi
- Asesu/mesur (yn cynnwys parodrwydd i gymryd risg a matricesau sgorio)
- Cofnodi
- Rheoli
- Monitro/adolygu
- Adrodd yn ôl

4. Ffynonellau gwybodaeth a ddefnyddiwyd i lywio'r risgiau a'r buddion

Atodiad A: Diffiniadau o'r effeithiau

Atodiad B: Terminoleg

1. Cyflwyniad

Mae'r ddogfen hon yn amlinellu'r dull a fydd yn cael ei fabwysiadu a'r prosesau a ddilynir i weithredu Polisi Rheoli Risg a Buddion y Cynulliad. Mae wedi ei anelu'n bennaf at y rheini sy'n gyfrifol am weithredu a rheoli'r broses o reoli risg a buddion ffurfiol, fel yr amlinellir isod.

Dyma'r **cyloch** ar gyfer ein dull o reoli risg a buddion:

Nodi ⇒ Asesu/Mesur ⇒ Cofnodi ⇒ Rheoli ⇒ Monitro/adolygu ⇒ Adrodd yn ôl

Mae cyngor a chanllawiau pellach am sut y rhoddir y broses hon ar waith ac ar gyfer nodi risgiau a buddion ar gael gan Gynghorwr Risg a Buddion y Cynulliad.

2. Cyfrifoldebau

Fel y nodir yn y Polisi Rheoli Risg a Buddion, mae gan **yr holl staff** gyfrifoldeb dros hysbysu eu rheolwyr ynglŷn â'r risgiau posibl a'r cyfleoedd i wella y maent yn eu nodi.

- Mae'r **Penaethiaid Gwasanaeth** yn gyfrifol am sicrhau y gweithredir y prosesau sy'n cael eu disgrifio isod ar gyfer **risgiau gweithredol**. Bydd yr **Hyrwyddwr Risg** ym mhob maes gwasanaeth yn rhoi cymorth drwy'r cylch o reoli risgiau gweithredol.
- Y **Prif Weithredwr a'r Cyfarwyddwyr** sy'n gyfrifol am sicrhau bod y prosesau hyn yn cael eu gweithredu ar gyfer **risgiau strategol**, gyda chefnogaeth y **Cynghorwr Risg a Buddion**.
- Y **Rheolwyr Rhaglen / Prosiect** sy'n gyfrifol am weithredu'r prosesau hyn ar gyfer risgiau o ran rhaglenni / prosiectau.

3. Y broses

Nodi

- Bydd y Penaethiaid Gwasanaeth yn canfod ac yn rheoli'r **risgiau gweithredol** allweddol, drwy ymgynghori â staff, yng nghyfnod cynllunio'r gwasanaeth a thrwy gydol y flwyddyn wrth i faterion godi ac wrth i flaenoriaethau newydd ymddangos.
- Y Prif Weithredwr a'r Cyfarwyddwyr fydd yn nodi'r **risgiau strategol** i ddechrau mewn ymgynghoriad â'r Bwrdd Rheoli. Bydd y risgiau a nodir yn cael eu hadolygu'n fanwl yn flynyddol, o gwmpas y blaenoriaethau a osodir am y flwyddyn i ddod. Bydd eitemau rheolaidd ar agenda cyfarfodydd y Bwrdd Rheoli hefyd i ystyried y risgiau posibl sy'n codi wrth gyflawni ein nodau strategol.
- Bydd y risgiau o ran cyflawni canlyniadau **rhaglenni a phrosiectau'n** cael eu nodi yn y cyfnod cynllunio. Bydd camau gweithredu lliniarol yn cael eu cynnwys mewn cynlluniau prosiect, lle bo hynny'n bosibl.

Asesu/Mesur

Asesir y risgiau a'r buddion mewn perthynas â'u **heffaith** (effaith y risg/budd yw'n digwydd) a'r **tebygolrwydd** (y tebygolrwydd y bydd yn digwydd). Caiff yr effaith a'r tebygolrwydd eu mesur gan ddefnyddio matrices sgorio a ganlyn – mae Atodiad A yn rhoi diffiniadau ategol manwl ar gyfer yr effaith. Er bod y matrices yn canolbwyntio ar risgiau, i hwyluso'r broses, gellir ei ddefnyddio hefyd ar gyfer buddion/cyfleoedd ar gyfer gwella.

Sgôr	Graddfa'r effaith	Diffiniad o'r effaith
1	Isel	Byddai'n cael ychydig o effaith neu ddim effaith amlwg ar yr amcanion gweithredol neu gorfforaethol.
2	Cymedrol	Byddai'n cael effaith amlwg, a fyddai'n effeithio ar effeithlonrwydd neu effeithiolrwydd y gwasanaeth, ond ni fyddai'n arwain at fethu cyflawni'r amcanion gweithredol neu gorfforaethol yn llwyr.
3	Canolig	Byddai'n arwain at fethu cyflawni amcanion gweithredol ond ni fyddai'n golygu bod risg i'r amcanion corfforaethol, ac ni fyddai'n cael effaith ehangach drwy weddill y Cynulliad.
4	Uchel	Byddai'n effeithio ar berfformiad yn erbyn un neu fwy o'r amcanion corfforaethol, a gallai beryglu sut y mae'r Cynulliad yn gweithio (llai na 24 awr).
5	Critigol	Byddai'n golygu na allai'r Cynulliad weithio am fwy na 24 awr ar adegau critigol i fusnes y Cynulliad; byddai'n achosi embaras mawr i'r Comisiynwyr a'r Bwrdd Rheoli; neu gallai arwain at gamau amhriodol yn cael eu cymryd gan y Swyddog Cyfrifyddu.

Sgôr	Graddfa'r tebygolrwydd	Diffiniad o'r tebygolrwydd
1	Isel	Mae'n annhebygol iawn y bydd yn digwydd, tebygolrwydd o 0-5%.
2	Cymedrol	Gallai ddigwydd, ond eto mae'n annhebygol iawn, tebygolrwydd o 5-10%.
3	Canolig	Tebygolrwydd o 10-40% y bydd hyn yn digwydd.
4	Uchel	Tebygolrwydd o 40-70% y bydd hyn yn digwydd.
5	Critigol	Mae'n digwydd eisoes neu mae'n debygol y bydd yn digwydd, tebygolrwydd o 70-100%.

Pennir “statws y risg/budd” drwy fesur effaith a thebygolrwydd y risg yn erbyn **parodrwydd y Cynulliad i gymryd risg**, sy’n cynnwys y graddfeydd a ganlyn:

- Isel;
- Canolig;
- Uchel; neu
- Gritigol, fel y dangosir isod:

		Effaith				
	Graddfa	Isel	Cymedrol	Canolig	Uchel	Critigol
Tebygolrwydd	Critigol 70-100%	Graddfa ganolig	Graddfa ganolig	Graddfa uchel	Graddfa gritigol	Graddfa gritigol
	Uchel 40-70%	Graddfa ganolig	Graddfa ganolig	Graddfa uchel	Graddfa gritigol	Graddfa gritigol
	Canolig 10-40%	Graddfa isel	Graddfa ganolig	Graddfa ganolig	Graddfa gritigol	Graddfa uchel
	Cymedrol 5-10%	Graddfa isel	Graddfa isel	Graddfa isel	Graddfa ganolig	Graddfa ganolig
	Isel 0-5%	Graddfa isel	Graddfa isel	Graddfa isel	Graddfa ganolig	Graddfa ganolig

Mae'r raddfa risg/budd yn ein harwain at y cam o benderfynu beth i'w wneud, a byddwn yn defnyddio'r wybodaeth ynghylch y **parodrwydd i gymryd risg** i'n helpu i wneud penderfyniadau ynglŷn â'r defnydd gorau o adnoddau.

Ystyrir lefel y risg mewn dwy ran:

1. Y risg gynhenid – *sef effaith a thebygolrwydd y risg os na wneir unrhyw ymdrech i'w rheoli, neu os yw'r ymdrechion i'w rheoli yn methu.* Mae'r risg gynhenid yn rhoi arweiniad o ran pwysigrwydd y risg os yw'r broses reoli yn methu neu os nad oes proses o'r fath ar waith. Mae hyn yn rhoi man cychwyn i ni benderfynu ar lefel y rheolaeth y dylid ei gweithredu.

2. Y risg weddilliol – *sef yr effaith a'r tebygolrwydd y mae'r risg yn eu cynrychioli gan ystyried y rheolaethau sydd ar waith i'w rheoli.* Y risg a reolir yw'r lefel y mae'r risg yn ei chynrychioli ar hyn o bryd i'r Cynulliad, o gofio'r camau rydym yn eu cymryd ar hyn o bryd i'w rheoli.

Wrth ystyried y buddion, dylai lefel y budd ganolbwyntio'n bennaf ar beth sy'n rhaid ei roi ar waith i sicrhau'r budd hwnnw – h.y. y budd a reolir.

Mae ein parodrwydd i gymryd risg yn pennu **sut rydym yn rheoli'r risg/budd**:

Risgiau/ buddion isel	Y Penaethiaid Gwasanaeth sy'n rheoli'r risgiau a'r buddion sydd â graddfa isel. Dylid defnyddio cyn lleied â phosibl o adnoddau i reoli'r risgiau a'r buddion hyn. Gellir eu goddef, ac nid oes yn rhaid gweithredu os yw'r adnodd yn bwysicach na'r budd
Risgiau/ buddion canolig	Y Penaethiaid Gwasanaeth sydd hefyd yn rheoli'r risgiau a'r buddion sydd â graddfa ganolig. Dylid cynyddu pwysigrwydd y risgiau hyn a'u trosglwyddo i un o'r Cyfarwyddwyr os oes unrhyw bryder bod graddfa'r risg yn cynyddu i fod yn raddfa uchel. Rhaid cynnal briff gwyllo yn fisol, ac efallai y byddai'n addas cael cynlluniau wrth gefn.
Risgiau/ buddion uchel	Y Bwrdd Rheoli sy'n gyfrifol am wneud penderfyniadau am risgiau a buddion sydd â graddfa uchel, a bydd y Cyfarwyddwyr yn hysbysu'r Comisiynydd sydd â'r portffolio perthnasol ynglŷn â'u natur a sut i'w rheoli. Rhaid rheoli risgiau uchel gyda'r diben o leihau'r raddfa risg drwy reolaeth gost-efeithiol. Rhaid rheoli buddion uchel i sicrhau gwelliannau. Rhaid sefydlu cynlluniau wrth gefn i ymdrin â gwaith sydd â risg uchel.
Risgiau/ buddion critigol	Mae angen i Gomisiwn y Cynulliad wneud penderfyniadau a rhoi ei farn ynglŷn â risgiau critigol, a rhoi trosolwg ohonynt, gan dderbyn cyngor gan y Bwrdd Rheoli. Bydd y Bwrdd Rheoli a'r Comisiwn yn cynnal adolygiadau trylwyr o'r risgiau critigol a <i>reolir</i> .

Cofnodi

Dylid asesu a chofnodi risgiau a buddion gan ddefnyddio ffurflen asesu risg ar dudalen. Ceir templad o'r ffurflen ar y Fewnrwyd. <http://aps/presidingoffic/fees-office/Risk%20&%20Benefits%20Management/index.htm>

Mae angen trosglwyddo'r wybodaeth i'r cofrestrï canolog. Defnyddir tri math o gofrestr risg ganolog:

- 1. Cofrestr Risgiau Strategol** - risgiau sy'n ymwneud yn uniongyrchol â chyflawni'r pum nod strategol a osodwyd gan Gomisiwn y Cynulliad a'r risgiau trawsbynciol sydd â natur swyddogaethol;
- 2. Cofrestrï Risgiau Gweithredol** - y risgiau sy'n wynebu'r sefydliad sydd â natur swyddogaethol ac sy'n gysylltiedig yn benodol â meysydd gwasanaeth;
- 3. Cofrestr Risgiau Gweithredol Sylweddol** - pob risg "uchel" a "chritigol" o'r Cofrestrï Risgiau Gweithredol.

Y Cynghorwr Risg a Buddion sy'n gyfrifol am ddatblygu a chynnal y Gofrestr o Risgiau Strategol a'r Gofrestr o Risgiau Gweithredol Sylweddol ac am ffeilio'r cofnodion perthnasol mewn ffeiliau cofrestredig i'w cadw'n ganolog. Y Penaethiaid Gwasanaeth a'r

Hyrwyddwyr Risg sy'n gyfrifol am lenwi a chadw'r Cofrestri Risgiau Gweithredol ac am ffeilio'r cofnodion perthnasol mewn ffeiliau cofrestredig i'w cadw gan bob gwasanaeth.

Rheolwyr y rhaglenni / prosiectau a fydd yn creu ac yn cynnal y cofrestri risg ar gyfer risgiau rhaglen / prosiect.

Bydd y cofrestri risg a'r papurau ategol yn cael eu cadw am chwe blynedd.

Rheolaeth, cynlluniau wrth gefn a chamau gweithredu

Wedi i ni nodi ac asesu risg neu fudd a phenderfynu a ydym yn barod i gymryd y risg, bydd angen cymryd camau i'w rheoli, a allai gynnwys:

- **Dileu'r risg** - bydd cynifer o risgiau sylweddol yn gysylltiedig â rhai gweithgareddau fel y bydd angen eu dileu i osgoi'r tebygolrwydd y bydd risg yn bodoli;
- **Goddef y risg** - gall yr adnoddau sydd eu hangen i fynd i'r afael â risg neu agweddau arni fod yn anghymesur â'r buddion a geir, felly gellir gweithredu elfen o oddefgarwch wedi'i reoli;
- **Ymdrin â'r risg** - bydd yn rhaid dileu y rhan fwyaf o'r agweddau ar y rhan fwyaf o risgiau (lle bo hynny'n bosibl) neu eu cadw at lefel dderbyniol, drwy reolaethau a dulliau lliniaru mewnol. Bydd ymdrin â buddion yn arwain at eu sicrhau;
- **Trosglwyddo'r risg** - lle na fydd risg neu agwedd arni sydd wedi'i diffinio yn cael ei rheoli gan y Cynulliad, gellid trosglwyddo'r cyfrifoldeb dros ymdrin â'r risg neu'r agweddau hynny arni (drwy gytundeb) i barti addas. Ar gyfer risgiau uchel neu gritigol yn benodol, mae'n debygol y bydd y parti arall yn ymdrin â'r risg, ac na fydd y cyfrifoldeb drosti'n cael ei drosglwyddo'n llwyr.

Bydd y rheolaethau a'r cynlluniau wrth gefn sydd ar waith, yn ogystal â'r camau lliniaru pellach, yn cael eu cofnodi yn y cofrestri a byddant yn cael eu monitro a'u hadolygu'n rheolaidd.

Monitro, adolygu ac adrodd yn ôl

Fel y nodir uchod, y Cynghorwr Risg a Buddion a fydd yn cadw ac yn cynnal y cofrestri canolog ar gyfer **Risgiau Strategol** a **Risgiau Gweithredol Sylweddol**. Bydd y Prif Weithredwr a'r Cyfarwyddwyr yn adolygu'r cofrestri hyn yn fanwl bob tri mis a bydd unrhyw newidiadau'n cael eu cyflwyno i'r Bwrdd Rheoli.

Bydd y Penaethiaid Gwasanaeth, gyda chefnogaeth yr Hyrwyddwr Risg, yn cynnal ac yn adolygu'r **Cofrestri Risgiau Gweithredol** ar gyfer eu gwasanaeth. Bydd pob risg sydd â graddfa "uchel" neu "gritigol" yn cael ei chyflwyno i'r Cynghorwr Risg a Buddion, fel y gellir ei hychwanegu at y Gofrestr Risgiau Sylweddol ganolog.

Ym mhob adolygiad chwarterol, cyflwynir y cofrestri i'r Prif Weithredwr a'r Cyfarwyddwyr gydag adroddiad ynglŷn â pha mor addas yw'r rheolaethau, y risgiau sy'n bodoli, y newidiadau yn y graddfeydd risg a'r cynnydd yn erbyn unrhyw gamau gweithredu.

Cyflwynir adroddiadau rheolaidd ar y risgiau a'r buddion critigol i Gomisiwn y Cynulliad. Bydd y Pwyllgor Llywodraethu Corfforaethol yn cael adroddiadau a fydd yn crynhoi unrhyw newidiadau sylweddol i'r cofrestrî risg neu'r prosesau i ymdrin â risgiau.

4. Ffynonellau gwybodaeth a ddefnyddiwyd i lywio'r risgiau a'r buddion

Mae'n bwysig ein bod yn casglu ac yn defnyddio unrhyw adborth a geir i'n hysbysu ynghylch unrhyw risgiau neu welliannau posibl i'n gwasanaethau. Mae Atodiad A i'r Polisi Rheoli Risg a Buddion yn cyfeirio at gyfrifoldebau'r Prif Weithredwr, y Cyfarwyddwr a'r Penaethiaid Gwasanaeth i ddatblygu, cynnal ac adolygu'r logiau cwyno a'r adborth gan bob ffynhonnell.

Mae'r ffynonellau hyn yn cynnwys:

- log o'r cwynion gan y cyhoedd;
- arolygon cyhoeddus;
- arolygon o foddhad Aelodau;
- cofrestr o'r manau gwan a'r awgrymiadau ar gyfer gwelliannau (llynell syniadau); a
- mecanweithiau adborth ar lefel y gwasanaeth.

Atodiad A

Asesiad Effaith	Effaith Isel	Effaith Gymedrol	Effaith Ganolig	Effaith Uchel	Effaith Gritigol
<i>Amharu ar ddarparu gweithredol arferol</i>	Ni fyddai'n cael llawer o effaith, neu byddai dim effaith, ar weithrediadau.	Byddai pobl yn sylwi arno, ond gellid ymdrin â'r effaith drwy addasu'r drefn neu'r gweithdrefnau arferol.	Byddai'n effeithio ar nifer o wasanaethau, ond gallai'r Cynulliad barhau i weithio, ond byddai safonau'n cael eu cyfaddawdu.	Byddai gweithrediad priodol y Cynulliad yn cael ei effeithio am hyd at 24 awr ar adegau critigol i fusnes y Cynulliad.	Byddai gweithrediad priodol y Cynulliad (Cyfarfod Llawn a Phwyllgorau) yn cael ei effeithio am dros 24 awr ar adegau critigol i fusnes y Cynulliad.
<i>Barn yr Aelodau</i>	Gallai un neu ddau o Aelodau gyfleu eu hanfodlonrwydd ond, yn gyffredinol, nid oes anniddigrwydd ymysg yr Aelodau	Mae'n bosibl y bydd rhai Aelodau'n cyfleu eu hanfodlonrwydd ond, yn gyffredinol, nid oes llawer, neu ddim, anniddigrwydd ymysg yr Aelodau.	Anniddigrwydd cyffredinol a pharhaus ymysg yr Aelodau neu codwyd y mater yn ffurfiol gyda'r Llywydd/Comisiynydd/Cadeirydd Pwyllgor.	Anfodlonrwydd sylweddol a pharhaus ymysg yr Aelodau neu aelodau grŵp neu bwyllgor penodol.	Lefel uchel o anfodlonrwydd ymysg grŵp mawr neu sylweddol o Aelodau/y Llywydd neu'r Comisiwn.
<i>Niwed i enw da</i>	Cwynion yn fewnol ac o bosibl mewn blogiau, ond dim cyhoeddusrwydd yn wasg.	Gohebiaeth negyddol mewn papur lleol.	Gohebiaeth negyddol mewn papur cenedlaethol yng Nghymru. Trafodaeth ar lefel y Bwrdd Rheoli.	Gohebiaeth negyddol yn y cyfryngau cenedlaethol, gan gynnwys sianeli teledu yng Nghymru. Anfodlonrwydd o fewn y Comisiwn.	Cyhoeddusrwydd cenedlaethol negyddol parhaus, neu ohebiaeth sy'n achosi imbaras mawr iawn.

<i>Ariannol</i>	Yn debygol o fod £10,000 o dan neu dros gyllideb y gwasanaeth.	Yn debygol o fod £20,000 o dan neu dros gyllideb y gwasanaeth.	Yn debygol o fod £30,000+ o dan neu dros gyllideb y gwasanaeth. Gellid tanwario'r gyllideb 5% neu fwy.	Gorwariant o fewn y cyllidebau adnoddau neu ariannol yn eu cyfanrwydd. Adroddiadau archwilio negyddol iawn ar reolaethau allweddol.	Gorwariant o fewn y cyllidebau adnoddau/ ariannol. Twyll ac anonestrwydd difrifol. Cyfrifon yn cael eu gwrthod.
<i>Perthynas â chyflogeion</i>	Rhai unigolion yn dangos anfodlonrwydd o fewn gwasanaeth.	Gallai anfodlonrwydd ymysg tîm cyfan effeithio ar ddarparu'r gwasanaeth os nad ymdrinnir â'r broblem.	Cwynion ar draws y gwasanaethau. Gallai effeithio ar ddarparu'r gwasanaeth os nad ymdrinnir â'r broblem.	Perthynas wael â chyflogeion drwy'r undebau. Y posibilrwydd o weithio yn unol â'r rheolau.	Gweithredu diwydiannol mewn meysydd allweddol sy'n atal busnes rhag parhau.
<i>Diogelwch</i>	Problem weithredol arferol.	Digwyddiad wedi'i gyfyngu, nad yw'n arferol, ond nad yw'n effeithio ar weithrediadau ehangach.	Digwyddiad anarferol wedi'i gyfyngu, sy'n effeithio ar weithrediadau arferol.	Byddai'r Cynulliad wedi'i gyfaddawdu - pobl mewn perygl, mae'n bosibl y byddai'n rhaid gwagio'r adeilad.	Digwyddiad difrifol, rhaid gwagio'r adeilad, bywydau'n cael eu colli

<i>Effeithiau amgylcheddol a chymdeithasol</i>	Byddai rhai aelodau o staff yn cwestiynu neu'n anwybyddu polisiau amgylcheddol mewnol. Peth gostyngiad mewn effeithlonrwydd.	Diffyg cefnogaeth ar gyfer yr agenda amgylcheddol. Costau adnoddau yn codi wrth i fwy o ynni gael ei ddefnyddio neu wrth i wastraff gynyddu.	Methu cynnal achrediad Lefel 5 y Ddraig Werdd.	Torri amodau deddfwriaeth amgylcheddol neu arllwysiadau/llygredd. Gweithgareddau yn cael eu dirwyn i ben dros dro.	Methiant hirdymor a chyson i gyflawni amcanion amgylcheddol a chymdeithasol.
<i>Iechyd a Diogelwch</i>	Digwyddiad bach, dim amser wedi'i gollu.	Anaf, ond dim amser wedi ei gollu.	Anaf, amser wedi'i gollu, neu ymwelydd yn gorfod ymweld â'r ysbyty.	Anaf neu straen difrifol. Cyfnod hir o ymadfer.	Colli bywyd neu anaf/anabledd parhaol a allai arwain at ymglyfreitha.

Atodiad B -Terminoleg

Risg	Mae risg yn cyfeirio at ansicrwydd canlyniadau camau gweithredu a digwyddiadau. Mae'n gyfuniad o'r tebygolrwydd yr aiff rhywbeth o'i le a'i effaith, gan gynnwys ei bwysigrwydd tybiedig. Mae'r tablau yn adran 2 ac Atodiad A uchod yn nodi'r diffiniadau o'r effaith.
Budd	Mae budd yn cyfeirio at ganlyniad cadarnhaol defnyddio rheoli risg i wella pethau, a'r effaith o gael diwylliant sy'n ceisio canfod cyfleoedd i wella, ac i ymdrin â manau gwan, drwy annog staff i gyflwyno syniadau ac awgrymiadau.
Effaith	Effeithiau'r risg os yw'n digwydd. Dyma'r sgoriau ar gyfer hyn: 1 - Isel, 2 - Cymedrol, 3 - Canolig, 4 - Uchel, 5 - Critigol Mae Adran 3 y ddogfen hon yn rhoi'r diffiniadau ar gyfer sut y gweithredir y rhain yn y Cynulliad. Mae Atodiad A yn rhoi diffiniadau manylach o'r effaith.
Tebygolrwydd	Y tebygolrwydd y bydd y risg yn digwydd. Dyma'r sgoriau ar gyfer hyn: 1 - Isel, 2 - Cymhedrol, 3 - Canolig, 4 - Uchel, 5 - Critigol Mae Adran 3 y ddogfen hon yn rhoi'r diffiniadau o sut y gweithredir y rhain yn y Cynulliad.
Graddfa risg	Defnyddir y sgoriau tebygolrwydd ac effaith mewn Matrics sy'n dangos parodrwydd y Cynulliad i gymryd risg (gweler Adran 3), sy'n creu graddfa risg gyffredinol. Bydd y risgiau y mae tebygolrwydd uchel y byddant yn digwydd ac sydd ag effaith uchel (ac i'r gwrthwyneb) yn cael eu cofnodi fel Risgiau Critigol.
Risg gynhenid	Effaith y risg a'r tebygolrwydd y bydd yn digwydd os na wneir ymdrech i'w rheoli, neu os yw'r ymdrech i'w rheoli wedi methu.
Risg weddilliol	Effaith y risg a'r tebygolrwydd y bydd yn digwydd gan ystyried y rheolaethau sydd ar waith i'w rheoli.
Parodrwydd i gymryd risg	Mae'n dangos faint o risg rydym yn barod i'w oddef a bydd yn llywio sut rydym yn rheoli risgiau/buddion.
Strategol	Y risgiau allweddol a allai amharu arnom neu ein rhwystro rhag cyflawni'r nodau a osodwyd gan Gomisiwn y Cynulliad a'r risgiau hynny hefyd sy'n rhai trawsbynciol o fewn y sefydliad. Cofnodir risgiau o'r fath yn y Gofrestr Risgiau Strategol.

Gweithredol	Risgiau sydd wedi'u canolbwyntio o fewn gwasanaethau penodol, ond gall risgiau ddatblygu'n rhai strategol os ydynt yn effeithio ar wasanaethau eraill neu ar gyflawni nodau strategol.
Sylweddol	Risgiau neu fuddiannau sydd â graddfa uchel neu gritigol.
Cynghorwr Risg a Buddion	Aelod o staff a ddynodir i gynghori ar drefniadau rheoli risg a buddion, ac sy'n adrodd yn ôl ar y cofrestri canolog ar gyfer risgiau neu fuddiannau strategol a sylweddol.
Hyrwyddwr Risg	Cynrychiolwyr o bob maes gwasanaeth i "hyrwyddo" rheoli risg a buddion o fewn eu gwasanaethau ac i gyfrannu at ddatblygu a gweithredu'r polisi a phrosesau.